

CUSSEGL GROND



Tarsisius Caviezel duai l'onn 2022 daventar il pli aut Grischun.

FOTO OLIVIA AEBLI-ITEM

Nominà Caviezel sco pli aut Grischun

Il deputà ed anteriur president da Tavau, *Tarsisius Caviezel*, duai daventar l'onn 2022 il pli aut Grischun. Sia partida, la Partida liberaldemocratica (PLD) ha nominà el sco vicepresident dal Cussegl grond.

Il presidi dal Cussegl grond mida mintg'onn da partida a partida: Sco proxim daventa ina dunna la pli auta Grischuna, numadamain *Aita Zanetti*, la deputada da Sent e co-presidenta da l'Alleanza dal Center dal Grischun. Ella succeda al president actual *Martin Wieland* (PLD) da Tumein.

Il dus rumantschs – *Aita Zanetti* e *Tarsisius Caviezel* – sto il Cussegl grond dentant anc eleger formalmain l'emna proxim durant la sessiun d'avust. (rtr/fmr)

SELVA

Cuntents cun strategia dal chantun

L'associaziun da proprietaris da gaud en il Grischun, la SELVA, ha pudì salvar venderdi passà en la Val Bregaglia puspè ina radunanza generala «normala», suenter in onn pausa da corona. A Stampa ed a Soglio han numerus commembers – sco la SELVA scriva en ina comunicaziun – approvà tut las fatschentas statutaras ed uschia pudì dar distgargia als organs da l'associaziun.

Ina da las tematicas centralas en Bregaglia è stada la problematica «gaud-selvaschina», sco la SELVA scriva. Il president da la regenza, *Mario Cavigelli*, ed ils dus manaders d'uffizi *Adrian Arquint* ed *Urban Maissen*, hajan pudì preschentar als commembers la strategia e las mesiras correspundentas dal chantun, mesiras preschentadas dacurt era a la publicità. Quella strategia era vegnida elavurada perquai ch'il gaud grischun ha difficultads da sa regiuvinar. Perquai prevesa il chantun enfin l'onn 2035 numerusas mesiras. Tranter auter vul el intensivà localmain la chatscha ubain promover singulas sorts da plantas. Questa strategia chantunala, preschentada e discutada en Bregaglia, haja pudì persvader ses commembers, scriva la SELVA.

La SELVA è in'organisaziun da non-profit, la quala represententa ils interess dals possessurs da gaud en il Grischun – tant possessurs privats sco era publics, sco p.ex. vischnancas. (cdm/fmr)



Infrastructura turistica – sco per exempel il Bogn Engiadina a Scuol – e medicinala è avant maun per porscher turissem da sanadad.

FOTO MAD

Unir basegns turistics cun purschida medicinala

La regenza grischuna vul concretisar las propostas dal model directiv elavurà per il turissem da sanadad en il Grischun. Ella ha incaricà Yvonne Brigger da coordinar projects che pledentan giasts che vulan sa recrear cun sustegn da la medischna. Ils plans èn vegnids preschentads ier a Cuira.

ANDREAS CADONAU/FMR

«Las resursas per promover il turissem da sanadad èn avant maun en il Grischun.» Il cusseglier guvernativ e schef dal departament da giustia, segirezza e sanadad, *Peter Peyer*, ha declerà ier a Cuira la purschida medicinala decentrala. «Il turissem da sanadad po gidar a mantegnair quella purschida decentrala a lunga vista.» *Peter Peyer* è vegnì sustegnì a la conferenza da pressa dal minister d'economia grischun, *Marcus Caduff*. Il schef dal departament d'economia publica e fatgs socials ha regurdà a diversas retschertgas che vessan in excellent avegnir per il turissem da sanadad. «Pli baud vegnivan bleras persuna en il Grischun per curar in malesser, ozendi vegnan blers giasts per promover lur bainstar corporal per prevegnir al malesser.» Il cusseglier guvernativ *Marcus Caduff* è pers-

vadì che l'infrastructura turistica e medicinala grischuna po cuntentar ils giavischs da quels giasts.

Dal model directiv al post da coordinaziun

Nov n'è il turissem da sanadad betg. Avant quater onns ha il chantun incumbensà *Philipp Gunzinger* dad elavurar in model per turissem da sanadad en il Grischun. La lavur è terminada e *Philipp Gunzinger* ha surdà la batgetta ad *Yvonne Brigger*. Ella è incaricada dal chantun cun sustegn dad ulteriurs commembers dad ina cumissiun da carmalar la medischna ed il turissem pronts da sa fatschentar cun purschidas specificas che pledentan il giast betg sulet a la tschertga da recreaziun. «Nus vulain daventar ina da las impurtantas adressas dal turissem da sanadad en Svizra.» Co che *Yvonne Brigger* vul cuntanscher questas finamiras ha ella explitgà ier a la conferenza da pressa.

Da malsognas cronicas enfin wellness

Far wellness e sa recrear cun sustegn da la medischna ha tenor *Yvonne Brigger* in potenzial per las instituziuns grischunas. Quest potenzial vesa ella era en la tgira sportiva tant per sportistas e sportists ambizius sco professiunals. E sco terz punct da partenanza propona *Yvonne Brigger* da sa fatschentar cun vacanzas per persunas che pateschan da malsognas cronicas. *Brigger* ha punctuà l'incumbensa principala da sia cumissiun da coordinar e sustegnair ideas concretas ch'èn avant maun. «Ils projects ston vegnir da las regiuns e da las instituziuns.» Per render pli enconuscent tant las pussaivladads dal turissem da sanadad sco il sustegn da la cumissiun e gruppa da coordinaziun, ha *Yvonne Brigger* annunzià per l'atun proxim ina tura tras il Grischun.

Festa da tir realisabla senza implants temporars

Passiun e tradiziun, quai è il motto da la 59avla festa federala da tir en tschintg onns a Cuira ed en il Grischun. Gia è il comité d'organisaziun principal engaschà cun l'occurranza da tir nazionala. A la testa da quest gremi stat cusseglier naziunal *Martin Candinas*. Schef dal resort tir daventa *Hubert Tomaschett*.

GION NUTEGN STGIER/FMR

Il matg da quest onn è vegnida fundada l'Uniuon Festa federala da tir 2026 a Cuira ed en il Grischun. Tant il chantun sco er la citad da Cuira sustegnan finanziailmain ed idealmain quella occurranza nazionala. Ier è vegnì preschentà a Cuira il logo da la festa federala da tir 2026 ed er il concept da quella. Il logo deriva da la plima da l'artist *Rudolf Mirer*. Cun cusseglier naziunal *Martin Candinas* han ils iniziants da quest event da tir chattà per il post da president ina persuna da renom naziunal, in um seriùs ed in politicher cun ina gronda rait e contacts nizzaiels sch'i va per organisar e realisar ina talmain gronda occurranza. *Candinas* ha ditg che passiun e tradiziun sajan bunamain il tetg da la festa federala da tir a Cuira ed en il Grischun. L'occurranza duai daventar ina festa populara ed in event persistent. Ultra da quai duai ella er esser in gudogn per turissem ed economia en il Grischun.

Vers 190 schibas per la distanza da 300 meters

Il center principal da la festa federala da tir 2026 sa chatta a Cuira. Aposta per quella occurranza vegn er sanà ed ampli-

fitgà il stand da tir dal Rossboden. Per quella sanaziun ed amplificaziun ha il parlament da la citad da Cuira gia deliberà ina summa dad 1,7 milliuns francs. Sajettà vegn uschia a Cuira e quai durant in mais, da mez zercladur fin mez fanadur 2026. Tratg vegn però er anc sin 25 ulter-

riurs stands da tir e quai en il Signuradi, da Domat fin a Tusaun, en la regiun Alvera ed a Tavau. A disposiziun stattan sulet per la distanza da 300 meters vers 190 schibas. Sco quai che *Carl Frischknecht* ha punctuà saja d'immensa impurtanza da far diever dals stands existents. Quai

ha er ditg *Candinas*, cun esser losch ch'i saja pussaivel d'organisar l'occurranza senza objects ed implants temporars.

Bunamain 20 000 pernottaziuns

La festa federala da tir en tschintg onns a Cuira ed en il Grischun saja er ord vista tu-

ristica ed economica da gronda muntada ha ditg *André Renggli*, il schef da finanzas e marketing. Da quintar saja grazia a l'occurranza cun supplementar 20 000 pernottaziuns. Senza sponsurs saja però la festa federala da tir strusch realisabla. *Renggli* quinta cun entradas da sponsoring da 2,5 milliuns fin 3 milliuns francs. Il budget giacha tar ina summa da 14 milliuns francs. Quai saja er la summa che vegnia generada entras l'occurranza en il turissem, la hotelaria e la gastronomia, ha punctuà *Renggli*. Cuira vegnia ad esser in bun ospitant ha ditg *Urs Marti*, il president da la citad. Quai che pertutga la canera pervia dal sajettar è el persvas da chattar fin il 2026 ina soluziun. Divisiunari *Lucas Caduff* vegn ad esser la persuna che segna per l'organisaziun dals dis e da las occurranzas spezialas. Spezialmain sa legra il Lumnezian da pudair organisar il tir dals giuvens, els che sajan il futur per il sport da tir. Cun *Hubert Tomaschett* è in segund Sursilvan commember dal comité d'organisaziun. El è l'um che conuscha il sport da tir en il Grischun bunamain sco sias atgnas giaglioffas e l'expert en chausa. Als comités d'organisaziun principals e locals fan part vers 150 persunas. En funziun vegnan durant la festa 1500 gidanters e gidantras.

Trais presidents ed ina finamira. Organisar perfetg la festa federala da tir il 2026 a Cuira ed en il Grischun. (da san.) *Urs Marti*, president da la citad da Cuira, *Carl Frischknecht*, president dals tiradurs grischuns e *Martin Candinas*, president dal comité d'organisaziun da la festa federala da tir 2026. FOTO GION NUTEGN STGIER